

No-Billag vul dir no RTR

Cussegl naziunal tracta iniziativa «Gea a la dismessa da la taxa da radio e televisiun»

DAD ALINA MÜLLER / ANR

■ **Da films tschufs, l'existenza dad RTR e dad ina cuntraproposta che saja era memia extrema – ier han ils parlamentarists discussiunà animadamain la dumonda co vinavant cun la taxa da Billag. Ils iniziants pretendan la dismessa da la taxa obligatorica.** Era sche la tendenza generala era da refusar tant l'iniziativa sco era la cuntraproposta ha la Societad Svizra da Radio e Televisiun (SRG) tuttina stuì prender encunter critica.

La maioritad cunter

La Partida socialdemocratica (ps), la Partida cristiandemocratica (pcd), la Partida liberaldemocratica (pld), ils verds ed ils verd-liberals (pvl) – els èn tuts s'exprimids cunter l'iniziativa dal pievel «Gea a la dismessa da la taxa da radio e televisiun». Sulettamain represchentants da la Partida populara svizra (pps) fan bels eglis a l'iniziativa. In dad els è *Lukas Reimann* ch'è en il comité d'iniziativa. El ha prendì il pled ed ha empruvà da persvader ils preschents da si'idea.

Era la cuntraproposta che vul fixar la taxa sin la mesadad da l'import actuala, vul dir sin radund 200 francs l'onni, è vegnida formulada d'in parlamentari da la pps, numnadamain da *Gregor Rutz* dal chantun da Turgovia. El di ch'el haja lantschà la cuntraproposta sco reacziun sin l'empermischun ch'i dettia ina discussiun davart la Billag. Quai avevan ils aderents da la revisiun da la lescha da radio e televisiun empermess a chaschun da la votaziun il 2015. La proposta da Rutz è



Cussegl naziunal Martin Candinas durant la debatta.

KEYSTONE

però vegnida taxada da blers sco memia extrema. *Mathias Reynard* la da ps ha schizunt manegià ch'ella saja extremistica. Uschia han ils blers recumandà da refusar la cuntraproposta.

Ballape è l'unic duvrabel

Adrian Amstutz, il president da la fracziun da la pps, ha exprimi ses frust sur dal

program da la Televisiun Svizra (SRF). Cun preleger la prevista per ina saira da televisiun constatescha el: «L'unica emisiun ch'ins sa duvrar è ballape.» I dettia memia bleras serias da l'exteriur. Plinavant para ad el che inqualina producziun online da l'SRG sumeglian plitost pornos che insatge auter e quai na saja per el betg service public.

«Dovri in Radio Virus, l'emittur per la giuventetgna dad SRF?», sa dumonda l'anteriur president da la pps *Toni Brunner*. El metta en dumonda sch'i dovra effectiv sis emitturs da radio da l'SRF en la Svizra tudestga. El na saja insè mai stà in ami da l'iniziativa, ma pli ditg ch'el persequiteschia la discussiun, dapli ch'el simpatiseschia cun

quella. Or da sia vista saja la SRG vegnida smasiraivla. Era *Natalie Rickli*, medemamain da la pps, sesa en la cumissiun da traffic e telecomunicaziun ch'è responsabla per l'iniziativa da Billag. Sche la cuntraproposta na vegnia betg prendida encunter sa vesia ella la sfurzada d'acceptar l'iniziativa, di Rickli.

Ex-moderatur e parlamentari

Mathias Aebischer, cusseglier naziunal da la ps, è quasi in expert en chausa SRG: el ha lavurà sco moderatur da sport e da la Tagesschau. Spert vegn el sin il punct: «Nagina Billag, nagin RSI, nagin RTS ed era nagin RTR!» Per el è la SRG in project cun DNA svizra originala. Sin diversas reclamaziuns pertugant il program dad SRF respunda el: «I dat adina emissiuns che na plaschan betg ad insatgi.» El recumonda da refusar l'iniziativa e la cuntraproposta.

Perfin liberals èn encunter

Schizunt la fracziun da la pld che cumbatta savens regulaziuns da l'economia è cunter l'iniziativa. «La SRG gioga ina rolla impurtanta en ina cuntrada da medias che sa mida fermamain», hai num da la vart da la fracziun da la pld. *Thierry Burkart* vesa però era basegn da discussiun sur da las incumbensas da l'SRG. «Las finanzas han da seguir al cuntegn e betg il cuntrari.»

L'ultim chapitel en questa chausa n'è anc betg scrit: la discussiun cuntraversa e per part emozionala vegn a cuntinuar il glindesdi, ils 25 da settember en il cussegl naziunal.